

REPUBLIC OF KIRIBATI



s21, 37(3) Disaster Risk Management and Climate Change Act 2019

s2, 16, 17, 18, 19, 20 Public Health Infectious Disease Regulation

CURFEW ORDER

Ngai, **Te Beretitenti, Taneli Maamau**, iaan mwakau are I a tia n anganaki man te tua ae Disaster Risk Management and Climate Change Act ao Public Health Infectious Disease Regulation ao I kanakoa te tua aio ibukin waaki ake a riai ni iraki karaoaia iaon South Tarawa ma Betio, Tarawa ieta, Abaiang, Makin, Butaritari, Abemama ao Aranuka ni kaineiti ma Alert Level 3b n aron aikai:-

1. Kainan te nakonako imarenan te aoa 1 n te karangaina ni karokoa te aoa 4 n te karangaina ni katoa bong.
2. Ana tabo ni mwakuri ma ana kambwana te Tautaeka nako ana bane n uki ma a na bane n ira nanon SOP are a tia ni kaweneaki ibukiia. Aobitin Bootaki n Aro ma Ekaretia a kona n uki ngkanna a nora riaina ibukin kabutan aia waaki ao a na ira naba te SOP ibukiia aobiti.
3. Bitineti nako a kona n uki ma a na riai n iri nanon kainibaire inanon ao itinanikun aia titoa n aron kabonganan rabunan te ubu, te tebo bai ao te aki babaware n aki akaka.
4. E uki te akawa ma tiaki imarenan te aoa 1 n te karangaina nakon te aoa 4 n te karangaina. E taburoroko bwa a na aerake n abamakoro riki tabeua ma bon ti te tabo are a mwananga mai iai.
5. A na kona n buti bao ni mwamwananga ma a na riai n kamatoa bwa e na kabonganaaki rabunan te ubu iaon aia bao, te aki babaware ao ongiran te

bwairi, e na uki taian winto ni kabane ao a na tekateka baatintia iaon kaintekateka akea te itobwatobwa ma te tei.

6. Reirei ni kabane a na bane n in ni karokoa Term 2. Ti reirei iaon Kiritimati, Tabuaeran ao Teraina ngkai e aki rangin nakoraoi te internet ao te rerio ibukin te angareirei.

7. Taabo ni mooi nangkona, mooi manging ao taabo n takakaro a kona n uki ma tiaki imarenan te aoa 1 n te karangaina nakon te aoa 4 n te karangaina.. E nang uki naba te bingko. A katauaki taabo aikai bwa a na taraia bwa e na bwainaki rabunan te ubu, te tebo bai ao te aki babaware n aki akaka inanon aia tai n uki.

8. Bobotaki nako ake tabeua a na kona ni waaki ma a na bon ira naba tuan te mauri n aron bwainaki rabunan te ubu, te tebo bai ao te aki babaware n aki akaka.

9. Mwamwanangaia kaibuke ao kiiba a bon kaukaki ibukin karokoan te bwaa, bwaai n aoraki ao kaako nako aonaba ri taari ao n te kibakiba.

10. Mwamwananga nako aonnaba ni ikotaki ma aaba ake a tuai roko iai te COVID-19 ao I marenaia abamakoro nako e a uki ma e na taraaki ma mwawan te auti ni katantan ao n iraki nanon te kainibaire (SOP) n aron te tutuo imwain te mwananga, Kawakinam iboni iroum (self quarantine), raoiroin mwin am tutuo imwain kibam, tenibong (3) am bong n rin n te tabo n katantan iaonnaba, ao raoiroin mwin am tutuo imwain ae ko kaotinakoaki. A kabaeaki Kautinara nako bwa a na karekei aia auti n katantan ibukin te itera aio. Ibukin waakinan te reirei ibukin Term 2 ao abamakoro ake iai te Kauarinan iaoia, ana kabongana ana tabo te reirei bwa tabo ni katantan ni kaitara maitin ataein te reirei ma tia reirei.

11. Inanon tain te mwamwananga ao a kabaeaki bwatintia ma taan mwakuri iaon te bao ni mwamwananga bwa a na kabongana rabunan te ubu. A

kabaeaki taan bwaibwai ao taan kabuta te bao bwa a na taraia bwa e iraki nanon aio iaon aia bao.

12. A kabaeaki bureitiman ao ana taan mwakuri te Tautaeka ake a tia n mwiokoaki bwa a na tara nanon te Oota aio ao te tua ae te Public Health (Infectious Disease) Regulation ao te Disaster Risk Management and Climate Change Act ao babaire riki ake a na kaotinakoaki imwina ba e na bane n iraki nanoia irouia aomata.

13. Babaire riki tabeua irarikin aikai aika a katawe man kawaekoaki karaoakii a na kona ni bon ti tuangaki naba bureitiman ao ana taan mwakuri te Tautaeka ake a mwiokoaki bwa a na karaoi nanoia ni kaineti ma taabo tabeua ke aomata ke mwakuri nako ao a mwaiti riki ake a noraki riaina ni karaoaki ibukin kakoroan nanon te Oota aio ma te tua ae te Public Health (Infectious Disease) Regulation ao te Disaster Risk Management and Climate Change Act ni kaineti ma te COVID-19.

14. Aki iran nanon te Oota ma tuua aikai bon uruan te tua ao a na kona bureitiman ni katikiko ao ni kamatawarikiko. Ko na kona naba n anganaki te tua n te tai naba are ko urua nanon te Oota aio (spot fine) irouia bureitiman n te mwaiti ae \$100 are ko na kabwaka nakon te Aobiti ni Mwane I Bairiki inanon 14 te bong man te tai are ko anganaki iai te beba n tua aio bwa ngkana ko aki ao ko na uotaki nakon te kabowi ibukin am bure iaan te Oota aio. Ibukin buokan te matata ao uruan nanon kainibaire ake inanon te Public Health (Infectious Disease) Regulation bon te bure naba iaan te tua.

15. Ngkana iai te kaokoro ke te aki matata n te oota ae koreaki n te taetae n Kiribati aio ma te Oota are koreaki ke n rairaki nakon te taetae n Imatang, ao e na riai n iraki nanon te Oota are e koreaki n te taetae n Kiribati aio.

16. Te tua aio e kamaunai Oota ake a tia n karaoaki mai imwaina ni kaineti ma te Aoraki ae te COVID-19 ao e na moa bwainakina man te Kanimabong 3rd June

2022 man te aoa 4 nte karangaina ni karokoa 10 n Tuun 2022 n te aoa 4 n te karangaina.

Dated 24th May 2022

.....
HE TANETI MAAMAU

TE BERETITENTI

Printed by exhibition at the Office of Te Beretitenti on 24th May 2022.

.....
DR. NAOMI BIRIBO
SECRETARY TO THE CABINET